

N A M U R C V M C O M I T A T V S .

inter, in monte vulgo *Polyache* dictum, parietina quædam & rudera veteris opidi *Chevremont*, hoc est, *Montis Caprarum*, quod destructum fuit per intestina bella cum Leodicensibus gesta, nec resurgere hæcenus potuit.

*Bovina.*

Quarto milliari à Namurco sunt *Bovina*, *Bovingne*, oppidum exiguum, quod bellorum injuriis jam aliquoties vastatum, postremum vero ab Henrico secundo Gallia rege, anno 1554 magna parte destructum est. Id ex eo tempore civium industria restitui & instaurari coepit.

*Charlemont.*

*Carolomontium*, *Charlemont*, arcis fere effigiem præsefert, propugnaculis suis bene munitæ. Distat Mariæburgo tribus, Namurco septem milliariibus. Situm peropportune in monte ad lævam Mosæ ripam, circa nobilem illum locum, quem vulgo vocant *Givet*. Nomen habet à Carolo V Imperatore, qui coercendis hoc tractu Gallis, Mariæburgum tunc tenentibus, extrui jussit, anno 1555. *Valencourtium*, *Walcourt*, oppi-

*Valencourtium.*

dulum tenue est, sed pulcherrimos undique agros adspectans. *Dava* pagus est ad Mosam flumen, qua Bovinas itur, arce validus, amplæque jurisdictionis, ita ut titulo gaudeat Vicecomitatus. Sunt præterea in pagorum catalogo varia loca non amplitudine minus, quam amœnitate spectanda, qualis est *Floren*, *Viseia*, & *Samsonia*.

Mutavit ista ditio superioribus seculis sæpe numero suos dominos. Vnde ex variis bellis, modo hac modo illa de causa concitatis, obnoxia fuit. Tenebat Marchionatum Namurcensem anno 1200 Philippus, frater Balduini Imperatoris Constantinopolitani. Factum autem variante fortuna, ut sub insecutis Principibus Marchionatus transferretur in Comitatum, ac tandem hæreditario jure, vel, ut alii volunt, emtione venerit in potestatem Philippi Boni, Burgundiæ Principis, atque inde Austriacis cesserit.

